

telebista ♦ irratia

‘KTM!’ gazteentzako saioak aurkezle berria du: Ilaski Serrano

Atal eta laguntzaile gehiago izango ditu aurrerantzean ETB1eko programak


Erredakzioa / Donostia

Urte berriarekin batera, aurkezle, laguntzaile eta atal berriak izango ditu *KTM!* gazteentzako saioak. Ilaski Serrano Urkiola izango da aurkezle berria, eta zeregin hori Xabier Aldanondorekin batera egingo du. Saioa ETB1etik eskaintzen dute, astelehenetik ostiralera, arratsaldero, 19:50etatik 20:30etara.

KTM! saioaren aldi berrian, 40 minutukoa izango da saioa eta *Madison* telesailaren ostean emitituko dute, 19:50etik aurrera. Lehen baino atal eta kolaboratzaile gehiago izango ditu: koreografo bat, dantza klaseak emateko; makilatzaile bat, aurpegia zelan margotu erakusteko; eta ekologia eta gauza birziklatuen gaineko aditua.

Musikak garrantzi handia izan du orain arte, eta bolarik ere halaxe izango da. Julius disko-jartzaileak bideo-klipak ekarriko ditu, eta bideo-klipen aukeraketa ikusleek egin ahal izango dute.

Itxuraz ere aldatu dute saioa; izan ere, multiset formatua estreinatuko du.



Ilaski Serrano eta Xabier Aldanondo, *KTM!*-ko aurkezleak.

Hortaz, aurrerantzean, dena leku bakar batean egin beharrean, bost toki edo setetan egingo dute. Hartara, Julius disko-jartzaileak bere txokoa izango du; elkarriketarako beste set bat egokituko da, hirugarrenean solasaldiak egingo dituzte, laugarrenean musika ekital-

diak edo erakustaldiak egingo dituzte, eta bosgarrenean gonbidatuek euren abilezia erakutsiko dute. Esaterako, komikigile baten lana ikusi ahal izango da, pausoz pauso.

Atal eta kolaboratzaile berriak izango ditu, bai, bai, na lehengo beste hainbat

soslaia Aldizkarietan eta irratian aritua

Ilaski Serrano Urkiola Bermeokoa da, 23 urte ditu, eta kazetaritza lizentziatua da. Kazetari moduan, zenbait komunikabidetan egin du lan. Hainbat aldizkaritan idatzi du, eta Euskadi Irratia eta Euskadi Gaztea irratietan ere ibili da. Halaber, asteburuko Euskadi Gaztea-ko *Argi ibili* saioan egiten du lan. Hemendik aurrera, telebistan ere agertuko da, Xabier Aldanondorekin batera *KTM!* gazteentzako magazina aurkezten, euskal katean.

tartek ere jarraituko dute. Beste batzuen artean, solasaldiak, psikologoa atalak, animaliei buruzko tartekak, horoskopopak, ile apaintzailearenak eta izaera testek osatuko dute saioa lehengo eran. Izan ere, programako arduradunen arabera, harrera ona izan dute atal horiek saioa hasi zenetik, hau da, irailetik.

laburrean

Kalamua zelan landatu azalduko dute ‘Bertatik bertara’ saioan

Kalamua zelan landatu erakutsiko dute gaur gauean *Bertatik bertara* ETB1eko saioan. Izan ere, Kalamudia taldeak kalamua landatzeko eskuliburu kaleratu berri du, eta Agustin Ezenarro kazetariak horren inguruko erreportaia prestatu du. Horretaz gainera, Pantonika Telleria eta Josu Unanue ohiko solaskideak ere izango dira saioan, hainbat gairen gainean berba egiteko.

Irakurketaren garrantzia berbagai ‘Forum’ saioan

Irakurtzeak burmuina garatzeko duen garrantziaz egingo dute berba gaur goizean *Forum* ETB2ko saioan. Adin maila bakoitzean zenbat irakurle dauden eta gehien zein liburu irakurtzen diren azalduko dute. Horretarako, David Barberok Pablo Zapata literatura irakasle eta irakurketa metodoetan aditua izango du solaskide.

Gizakia eta espazioa ‘Ikusgela’ saioan

Gizakia eta espazioa da gaurko *Ikusgela* saioiko gai nagusietako bat. Orain arte gizakiak espaziora iristeko egin dituen saioak gogoratu ez ezik, espazioaren konkistaren etorkizuna aurreikusten ere saiatuko dira bideo didaktikoaren atalean. Horretaz gainera, lur gaineko kontu, bitxikeria eta jakingarriak ere erreparatuko diete. Pertsona ezaunaren galerian, Dolores Ibarruri *Pasionaria* eta haren bizitza gorabeheratsu eta iraultzailea gogoratu dute. Esperientzien atalean, bestalde, Ipar Euskal Herrira egingo dute bisita. Berriki Seaskak 30 urte bete dituela eta, Ikusgelak Iparraldeko ikastolen ibilbidea ekarriko du gogorra. Horretarako, Itxaro Borda Seaskako presidente berriarekin mintzatuko dira. Goizean, 11:30etan, hasiko da *Ikusgela*. EAEko Hezkuntza Sailarekin elkarlanean egindako telebista saioa da.

txoritxoari mokoka ♦ Ines Intxausti

ORDENAGAILUAREN gainean dudak gauza bat deskribatuko dizuet. Salamancan saltzen dituztela uste dut. Eta agian zuetako askok halako bat izango duzue etxean, baina ez ordenagailuaren gainean. Liburu bat zabalik dago, horren gainean burezur bat, eta burezuraren gainean igeltxo bat. Donostiako Malen izeneko lagun fin baten oparia da. Badu bere zera ezta? Liburua, burezurra eta igeltxoak. Liburuak jakituria adierazten du. Burezurak gure burmuinak kultura guztia zurrupatzeko duen ahalmen erreala. Eta igeltxoak, berriz, irudimena. Edo horrela ulertzen dut nik behintzat. Hiru gauza horien ondoren baldin bazaude, ez zara zoriontsuago izango, jakina. Baina idaztera zoazen bakoitzean ordenagailuaren gainean jartzen baduzu, seguruago senti-

Pourquoi pas?

tuko zara. Bai horixe. Alboan biltzen ditugun gauzen presentzia gehiago aztertu beharko genuke. Une honetan artikulatu hau irakurtzen zaudelako, baina etxeratzekoan kontura zaitzez horretaz. Sukaldean, logelan edo komunetan ditugun fetitxeek badute bere esangura esentziala. Norberak aukeratzen du bere bizitzaren *atrezzo* materialista. Guztiz manierista naiz zentzu horretan. Eta oraindik nire bizitzak pare bat gauza besterik ez ditu maletan eramateko modukotzat hartzeko, noski. Bata, igeltxoak, liburuak eta kaskezurrak osatzen duten tripodea. Eta bestea hutsik dagoen botila eder bat.

Historian zehar egin diren elkarriket-

ten artean badaude ezin topikoagoak diren galdera batzuk. Orain arte ez du inork esan uharte bakartu batera telebista eramango lukeenik. Nire aitak esaten duen bezala, «ez da oraindik jaio horrelakorik egingo duen amaren seme-rik...». Eta hobe ez bada jaiotzen. Gero eta jende gehiago bizi da aparailurik gabe. Telbistarik gabe esan nahi dut, poliseamia arriskutsua ekiditeko. Gero, agian, ez dakite zer den *Furor* izeneko programa. Baina horrek ez dauka zerikusirik, liburu, burezur eta igeltxoarekin, noski. Ni ez nintzateke zoriontsuago izango telebistatik gabe. Tyrannosaurusik gabe berdin-berdin sentitzen naiz lurrean. Baina oraindik nire telebista ez dut jarriko ordenagailuaren gainean. Ezta telebistaren gainean burezurra, liburuak eta igeltxoak. Mesedez!